

Peqqussutissat siunnersuummut nassuiaatit

Nassuiaatit nalinginnaasut

Peqqussutissat siunnersuutip saqqummiunneqarnera ineqarnermut tunngasut tamanut tun-ngatillugu allannortiteriffiqineqarnerannut ilaavoq, tassa ilaatigut kissaatigineqarmat A/S Inissiaatileqatigiiffik INI-p sunniuteqarnerulersinneqarnissaa allannortiteriffiqineqarnissaalu, taamaalilluni ingerlatseqatigiiffik suliaassarpiaminik, tassalu inissiat attartortittakkat ingerlanneqarnerannik aqunneqarnerannillu, siunissami taamaallaat suliaqalersinnaaqullugu.

Peqqussutissat siunnersuutip kinguneraa A/S Inissiaatileqatigiiffik INI-p suliaassanik assigiinngitsunik pingasunik suliaqalernissaa,

- oqartussaasutut suliaassat piginnaatinneqareernikkut naammassineqartussat,
- suliaassat suliarineqartussat neqeroorutigineqartut, aammalu
- siunnersortitut suliaakkiutit

suliaassaqrfinni assigiinngitsuni marlunni illuatungaaticut inissianik ingerlatsineq, aqutsineq aserfallatsaaliuinerlu illuatungaani lu sanaartornermut tunngasuni sanatitsisutut atuuffik.

Inissiaatileqatigiiffimmik pilersitsinerup suli siunertaraa, Inatsisartut 1993-imi upernaakkut katersuunneranni inissiaatileqatigiiffimmik pilersitsinissaq pillugu immikkoortup oqaluuserineqarnerani soorlu oqaatigineqartut *„Ingerlatseqatigiiffimmik pilersitsineq najugaqartut oqartussaaqataanerannik nukittunerulersitsissaaq taamaalilluni attartortut inigisaminnut sunniuteqarnissaminnut qularnaarunneqassammata aningaasat, ingerlatsineq avatangiisillu eqqarsaatigalugit. Taamaattumik attartortut sullissinerit, aserfallatsaaliuilluni pitsanngorsaallunilu suliaassat kiisalu nutarterinissat il.il. pitsaassusissaannut siunissami aalajangii-sooqataalissapput.“*

Inissiaatileqatigiiffiup ukiuni kingullerni marlussunni ukiut ingerlatsivini siulliit tallimat nalilersuiffigisimavai. Sulinerup tamatuma inerneraa iliuusissatut pilersaarut nutaaq, taamaalilluni ingerlatseqatigiiffiup pingaarnertut suliarilissallugit suliaassat inissianik aqutsinermut tunngasut, taamaattumik ingerlatseqatigiiffiup pissusissamisuuinnartutut suliarinnaassavai suliaassat pisortat ingerlatsineranni ilequusut malillugit naammassineqartartut.

Nalornissutigineqassanngilaq inissiaatileqatigiiffiup aqutsivittut ingerlatseqatigiiffiunera inissianik attartortittakkanik periutsit aningaasanik atorluanaanerusut atorsinnaalluartullu malillugit aqutsiviginninnissamik suliaassaartoq. Inissiaatileqatigiiffik isumaginninnikkut ingerlatsivittut allatut ingerlassanngilaq

innuttaasut inuuniarnermi aningaasaqarniarnerannik imaluunniit inissaqarnissaat pillugu naammassinnittuussanngilaq. Suliassat tamakku kommunit suliassaraat.

Peqqussutissatut siunnersuut KANUKOKA-mut, SIK-mut, Isumaginninnermut Suliffeqarnermullu Pisortaqaarfimmuut kiisalu A/S Inissiatileqatigiiffik INI-mut isummerfigeqqusissutigineqarpoq (tusarniaatigineqarpoq). Aammattaaq siunnersuut inatsisissanik nalilersuisarfimmit misissuataarneqarpoq. Tamakku kingorna oqaaseqaatit naleqquttut tunuliaqutaralugit siunnersuut iluarsaanneqarpoq.

Peqqussutissatut siunnersuutip allaffissornikkut kingunerisassai

Peqqussutissatut siunnersuutip taamaallaat nassatarissavaa inissiatileqatigiiffiup suliassanik sunik suliqaartussaanerata erseqqissaavigineqarnera.

Peqqussutissatut siunnersuutip aningaasatigut kingunerisassai

Siunnersuutip nassatarissavaa immikkut sullissinerit pillugit isumaqatigiissutit ingerlatseqatigiiffip suliassarpiaanut ilaanngitsut Namminersornerullutik Oqartussat inissiatileqatigiiffiullu, imaluunniit illunik piginnittup, assersuutigalugu kommunit inissiatileqatigiiffiullu, akornanni kiffartuunneqarnissamik isumaqatigiissuteqarfigineqartarnissaat. Maannakkut Namminersornerullutik Oqartussat inissiatileqatigiiffiullu akornanni kiffartuunneqarnissamik isumaqatigiissuteqarpoq, tassani pineqarput Namminersornerullutik Oqartussat ineqarnermut tunngasuni suliassaataat tamarmik. Kiffartuunneqarnissamik isumaqatigiissut taanna suliassat aalajangersimasut pillugit kiffartuunneqarnissamik isumaqatigiissutinut aggulunneqassaaq.

Suliassanut ullumikkut inissiatileqatigiiffimmit isumagineqartunut amerlanerusunik aningaasaleeqqittoqarnissaata pisariaqalernissaa naatsorsuutigineqanngilaq.

Aalajangersakkanut ataasiakkaanut nassuiaatit

§ 1, nr. 1-imut

Aalajangersakkap kingunerissavaa A/S Inissiatileqatigiiffik INI-p pingaarnertut suliassarilissammagit Namminersornerullutik Oqartussat inissiaataasa ingerlanneqarnerat, aqunneqarnerat aserfallatsaaliuiffigineqarnerallu. Taakku saniatigut suliassat arlallit inissianik ingerlatsinermut sanaartornermullu tunngassuteqartut naammassineqarnissaat pillugu inissiatileqatigiiffik isumaqatigiissusiorsinnaavoq.

Inissiaatileqatigiiffiup suliassai agguataarneqassapput suliassarpiaanut saniatigullu suliassaanut, imaappoq saniatigut ingerlassanut. Suliassarpiaa, imaappoq Namminersornerullutik Oqartussat inissiaataasa ingerlanneqarnerat, aqutsivigineqarnerat aserfallatsaaliorneqarnerallu, iluanaarniutiginagu ingerlanneqassapput, taamaammat inissiaatileqatigiiffiup Namminersornerullutik Oqartussat aktiaateqarluni ingerlatseqatigiiffiattut pisariaqartinneqartut saniatigut ingerlatseqatigiiffik ingerlatsinermut sillimmatissanik katersissanngilaq ani-ngaasanilluunniit katersissanani, tassa sullitarpiani, attartortut, pisariaqanngitsunik ani-ngaasartuusersortussaannimmagit.

Suliassat allat inissiaatileqatigiiffiup tigusai, imaappoq ingerlatseqatigiiffiup saniatigut ingerlassai, immikkuutaarlutik ilanngaatisat ilanngaatigereerlugit iluanaaruteqaataaqataassapput. Tamanna isumaqarpoq saniatigut ingerlassat ataasiakkaat pitsaasumik matussuseeqataanermik saniatigut iluanaaruteqaataaqataassapput. Tamanna ima paasineqassaaq isertitaq ingerlassanut aalajangersimasunut akissaajaatit ilanngaatigereerlugit suli iluanaaruteqaataassasoq.

Saniatigut ingerlassat kifartuunneqarnissamik isumaqatigiissutit atorlugit naammassineqarsinnaapput, tamanna ima paasillugu saniatigut ingerlassat imminni ilanngaatisat ilanngaatigereerlugit iluanaaruteqaataaqataassanngillat, taamaammat suliakkiisoq ingerlatassap naammassineqarnissaanut immikkut akiliuteqartassaaq. Kiisalu suliassat aalajangersimasut naammassineqarnissaat pillugit inissiaatileqatigiiffik immikkut isumaqatigiissusiorsinnaavoq.

§ 2-mut

Aalajangersakkap kinguneraa peqqussutissatut siunnersuutip 1. juni 2003-mi atuutilernissaa.